

四庫全書

集部

欽定四庫全書

集部

彭城集卷二十一至
四

詳校官庶吉士_臣馬履泰

檢討_臣何思鈞覆勘

總校官進士_臣程嘉謨

校對官編修_臣朱紱

謄錄監生_臣鍾拔元

欽定四庫全書

彭城集卷二十一

宋 劉攽 撰

內外制

御史中丞孫覺可龍圖閣直學士提舉醴泉觀依
舊兼侍讀制

吾以風憲齊邦法而用經藝求多聞儒臣之任是者異
事而同功此皆有益於朝者也具官某資性樸茂學問

該達有子政之博識兼叔向之遠直近者擢置中司以從民望未得聞生之奇論乃固以疾而來鮮知其不欺在所從欲擢龍馬之峻秩仍虎門之詔徵兼總殊庭之事增重講閣之寵祇服休命毋怠初心

中散大夫天章閣待制知鄧州陳安石可龍圖閣直學士差遣如故制

朝廷嚴侍從之聯待通博之士惟其器足以大受知可以重任望所歸者而後畀之延閣相望左職維叙眷茲

遶東義靡虛受具官某材實周用名允副實迨者齒克
成壯猷內參藻鑑之司外總藩宣之寄率有可紀不替崇
譽宜示甄擢以疇義最惟河圖之所藏居石渠之右地學
士之選儒者為榮寵數亟加懋恩思報勉力無怠對揚休命
故鎮江軍節度使檢校太尉守司空開府儀同三
司致仕康國公韓絳可特贈太傅餘如故制

股肱之臣社稷是衛生則體貌盡禮以示老成之貴沒
則哀榮稱情以著云亡之歎非其盛德曷膺異數具官

其大器有容直道自任舉厝見乎事業忠厚發於性情
再登上宰稱爲賢相周公師保萬民惠澤浸廣召伯弼
亮四世嘉績維多耆老里居乃心王室風猷所暨毗益
仍遠天不愍遺奄至淪喪朕用傷悼莫可追贖宜加愍
策進宗贈典躋帝傳之寵名賁衰章之襚服泥書蜜印
以光泉壤靈其有知膺是休命

皇城使昭州刺史郭忠紹可差知岷州制

先帝斥廣邊圉控制西戎惟三軍之師與連城之守訓

兵治民文武並用非有兼智曷嘗輕付以爾効力洮隴
克有善譽屬他部引嫌以汝易地勉勤職業用副光寵
朝請大夫新差知邠州蹇周輔可差知廬州朝散

大夫知廬州史宗範可差知邠州制

朝廷建官分職無有遠邇皆務以利民者也度材而任
之以示大公至於從人之欲小濟其私是以天道無害
於治以周輔耆艾久吏使莅幽土而以情自上求所便
安惟宗範合肥之政課最可稱命總邊瓊益用觀能易

地而處俱謂宜允思所報効毋孤任遇

知滑州劉程可知湖州知唐州王得臣可知邠州

制

壤地不齊南北殊俗吏治何先法令惟一智者足以興
事敏者莫不有功顧惟大邦每擇良守以某悉為久吏
亟更符守吳興南方之都會新平西道之要衝分以付
之思所報効

朝請郎試大理卿杜紘可直秘閣知齊州制

漢制列卿郡守通為二千石其在朝會中都則見惟月
之重矣夫其屏翰千里乃知連城之寵內外之別夫奚
足云以某器術通博法律精明執事輦轂歲月逾久致
位廷尉任遇亦重而勤勩已虺黽勉弗任思從息肩顧
得補外朝廷俯從人欲付之郡章昔人以卿秩出守用
為寵榮今汝貼職中秘臨治稷下恩數兼渥思所報効
寶文閣直學士正議大夫謝景溫可知鄆州制

機衡之任內則八座為重方嶽之寄外則十連稱貴慎

選攸屬周材是膺將明所資出處奚異具官某立性挺
特遭事開敏白黑明辦予奪時當擢領秋官之長實處
文昌之要朕惟鄒魯舊壤皞濟奧區賦政之優變道惟
允輟聽履之妙選付連城之重寄敬服崇寵益其善最
朝散郎孫賁可知邵州制

湖湘之南蠻獠雜居乃或不虔邊圉肆為侵暴夫豈足
勞吾剪薙也莫若擇良守就而撫之震讐其姦猾存育
其柔服斯無事矣以其健於為吏幹譽頗著付之連城

其思遠略不孤寵命

新知河中府葉康直可知秦州制

先帝攘却胡狄斥大邊圉秦亭之地僅若內郡然其襟帶隴阨門戶已蜀小戎車甲之盛夷漢走集之要方之前世固自若也擇帥之重尤所慎焉以其前奉使指臨安陝服智之所及事乃無曠至其攝莅漢陽頗歷時序士服熟其訓練民便安其簡易審羗虜之情偽解山川之要害因而任之成效宜速俾易蒲中之寄以究隴上

之治貼職龍馬寵命在先勉服思榮益思盡瘁

侍御史杜純可知相州制

向繇卿寺擢貳臺憲以某猷獄先帝常有確論乃茲登
用實冀毗益而議者言其處事堅完持心近薄又臺中
故事非繇科第不登是選重為不宜解白筆之重權付
赤帷之優寄三臺舊壤千騎殊寵公朝未嘗棄材能吏
思所報國

西京作坊使知奇嵐軍王景仁可知原州制

西方諸郡與羌戎接者皆為要衝五原其一也為其守者愛養士卒宜得其死力遠置斥堠使前知虜情將畧之最莫先於此以某久習邊瑣因付重寄益務自勵不孤恩寵

溫州刺史提舉萬壽觀公事向崇回可知蔡州制吾求循良之吏以付郡州之治才無所遺則不限文武之異功有所勸亦初無戚賢之別以爾謹身奉法強力從事其以為政宜無曠職汝南大郡生齒繁夥聽訟察

獄慎而母怠服我休寵母致民謗

龍圖閣待制知河中府王震可知鄭州制

介二都之浩穰承千里之風化陪京之重是惟鄭邦擇
守之慎非材莫處具官某寬裕容物豈弟信已治民之
效所至見稱付東里之奧區按緇衣之舊俗務崇民譽
以稱上恩

中散大夫燕介可知棣州制

齊之北境是曰無棣魚鹽之饒俗以富庶其於為治易

使安輯以其更練民事通達人情付之專城益觀成效
知宿州呂溫卿可知湖州承議郎王鞏可權知宿

州制

有地千里而長百吏發政施令良民足以訓養猾民足
使畏服有志之士知其可以有為莫不願之矣以某等
通敏用務付之專城之寄符離吳興又東南之奧壤也
思所建置之副休命

知汝州邢恕可知襄州制

江漢之域襄陽為大鳳林以為阻鹿門以為望嵒之
毗獄訟亦寡然隄防弗固則有昏墊之憂竹屋相比或
致延燒之患往之良材以茲為先爾以敏材慎慮試於
為郡既歷一邦頗有能效付漢陽之奧壤增符竹之寵
榮祇服茂恩益期善政

西上閣門使重种古可知鄜州制

治民訓兵文武異道惟其兼才乃能適用西方諸郡疆
圉羌狄鄰為次邊實當走集軍旅士馬之訓金穀獄訟

之劇為守為將是以重矣以某久更吏職益閑戎畧付之左符屏茲要郡竭力盡慮副吾選擢

朝議大夫馬淵可知沂州制

束髮從仕至于耆老近臣之稱薦者章數十上是其有以過人者海沂大邦民物繁富庸付章鼓以期善最夫治人之術譬猶養身毋暴其氣正心以存之則有康寧之報汝慎之哉

朝奉郎守鴻臚少卿黃隱可權知泗州朝奉大夫

宋彭年可權知邢州制

九寺之貳是為要官前以鴻臚大農用隱彭年而議者
謂處非其位不可虛授朝廷重於失士乃復試之民政
右河左淮二郡為大邢兼趙衛之俗酒當舟楫之會有
所施為易致功譽益務勤恪以稱付委

朝請大夫韓晉卿可光祿少卿朝奉郎知相州杜
純可知徐州制

卿寺總集邦事州郡在宣王化二者之重非有左右豈

其以內外而為輕重乎以晉卿純敏識強力通習律令
試郡未幾民譽有在擢貳光祿徙治西楚度材而處來
效是期勉力慎修毋敢豫怠

知潤州朱服可知福州制

閩嶺以南長樂為大生齒繁夥其養不足則獄訟易興
風俗利弊其教不篤則禮樂罕聞為之治者抑亦難矣
以某既更吏事因付邦寄思所以裕民生敦禮與義庶
無負委任矣其勉之哉

朝奉郎邢平可知衡州制

郡縣之遠於京師者其能使上恩宣布賦役均平民無
愁歎之音惟守長之才爾衡山之陽湘水之左厥民咎
窳為生甚薄生齒繁夥占數至廣命汝蒞而撫之勉力
思効上謹詔條下盡民情夙夜匪懈斯得之矣

右驂驥副使王良可權知黔州制

西南諸蠻馴服聲教而黔中之地當其衝要內則嚴徼
塞之走集外則總羈縻之琛賁郡守之寄朝選為重以

某知慮有取武畧已效宜試連城剖符之任以觀治戎
訓民之術

皇城副使王鑒知莫州制

邊郡鎮守兼有民事以威武震懾戎落以律令聽察獄訟
其亦難矣可無選者某累更任使常著能效帥臣稱其
材敏薦之於朝因而用之吾無推擇之煩其勉勵幹力
勿負恩渥

中散大夫裴士林可知同州制

法令所以平民也得其情則文無害賦役所以用衆也處其中則下無怨是二者州郡之先務非良吏不能及之以某智慮詳敏達於從政薦歷繁劇常有稱述惟左馮之奧區自二漢而稱重付茲連城之寄用觀下車之效平民用衆汝宜慎之

權發遣廣德軍邵才可權知滁州制

凡工人之事習慣則其巧倍初學為政者亦若是矣爾前守軍壘卒戍無曠今復用汝為郡屬城生齒其數愈

廣汝以習慣莅之事將無難勉之慎之以集民譽

朝散郎熊舉可知泰州制

海陵故江都之屬邑也居江海之會民占魚稻之饒雖
曰小邦實為沃壤以其前守辰陽克有善譽茲故付以
虎符之重粵當康疇之墟察訟督賦期以裕民無怠爾
心以集來效

朝奉郎賈種民可知濮州制

冉求政事之材也而曰如五六十求也為之此邑宰之

任也賢者之於民事宣易之哉今州郡之寄總列城之富長郡吏之治利澤足以及物雖曰小邦為榮遇矣濮實古郡邇於王畿汝自請而得其有以幹固稱職乎

供備庫使侍其璿可知祁州制

邊徼之郡戎馬所集將守之任文武兼用內輯民務外察虜情求其宜稱其亦難矣以其屢更繁使頗著能名付虎符之權當鳶韞之境益勤遠畧以就來效

朝奉郎張徹可知沂州制

山東諸郡臨沂為大其民雜有桑麻之業其田兼備魚
稻之饒為守之貴仕宦之美推擇付汝寵光斯在聽獄
察訟勤民急吏毋有怠惰以就功緒

殿中侍御史孫升可權知濟州制

為耳目之官當風憲之任惟其直亮乃所稱職曾不是
思輒敢誣上置廷臣鄙倍之愆既莫繩正肆已志朋比
之素仍事詆欺義所弗容法其安舍宜奪蘭臺之職俾
分竹使之符尚體寬恩無重前悔

知京師張祐可知隴州制

隴阪之西為國門戶羌戎向化而服內漢兵屯戍而禦
侮宜得良材任為守帥以某練集軍事懷韞智畧俾付
左府之寄以總連城之固其克勤蓋用副推擇

皇城使郭祥可知龍州制

邊徼之地夷漢雜處訓兵以律治民以政文武兼備乃
為宜稱朝所慎選異於內郡今江油闕守推擇用爾勉
務勤恪以就功緒

司農少卿韓正彥可知滄州制

卿秩出而為郡古之寵數也矧南皮奧壤渤海巨鎮魚
鹽之饒則知編戶之富邊圉所寄復見專城之重惟爾
久從吏職嘗宣使指悉著能績近無官謗是用付之左
符虎竹之榮當此一道兵民之務實因徃效以蒙新寵
勉思職業用永休譽

知濟州王廷禧可知登州制

負海之邦文登為大肅慎是鄰遼碣在望烽火之警太

平弗忘擇守之難其亦奚易以爾名臣之裔素風自脩
比守列邦皆有善最付爾之衆之城恪守岨夷之奧勉
循詔條以致民譽

商州盧某可知台州制

有地千里列城三四社稷人民之奉仕宦之達者也商
於天台皆古名郡易地迭處汝榮多矣布宣上澤勤卹
民隱毋違詔條毋爽夙譽汝其慎哉

朝散大夫天章閣待制楊繪可知杭州制

訓農養民之務聽訟察獄之要在於得情而居厚不可
便文而趣辦茲所以儒生貴於俗吏法律輔以詩書我
擇良守以是為準具官某心慮端直學術純固接物而
為簡易從政而號宣第前守南邦亟聞治最輕揚善闢
之民機巧趨利之俗懷惠不舍去思迄今是宜復假左
符以當一道其亦力崇來效嗣續前美夫飾廚傳以稱
使客志逍遙而忘政治前史以為譏風詩以示刺汝慎
之哉無孤寵命

供備庫副使魏公旦可知嵐州制

樓煩要地戎馬走集震愴邊陲宣明漢德守將之任其
亦重矣爾以武人之俊久經驅策付之連城實固吾國
思盡權畧以酬恩遇

新差知單州鄭佾可知懷州朝散郎安宗奭可知
單州制

昔子賤巫馬之為單父勞逸不同而皆稱治能者之於
民事固常有為而非一道也然此衰周列侯之國小邑

寡民之政何足爲盛世言乎今列郡田閭富庶法令完
備太守官儀之寵巍然千騎之長於以施教布政則加
易而不難矣河內漢爲大邦單武今則名郡以付爾等
其亦有子賤巫馬之志副吾委寄乎勉之慎之勞逸無
怠

權兩浙轉運副使韓晉卿可知徐州制

漢制刺史居部九歲乃爲守相夫惟專城之重豈減傳
車之寵爾奉使二浙即更歲月爰付左符俾臨西楚豈

弟以裕民俗精察以平獄訟農畝無擾盜賊知畏勉而行之勿孤寵命

通判滄州趙澤可權知商州制

昔虞詡之治朝歌也方其盜賊之盛以盤根錯節而喻已為利刃者也後卒成功如其志焉有為者當若是矣今吾以商於大邦寇攘充斥思其弭安在於能吏汝以幹略素譽可當推擇拔於郡貳付之專城分虎憑熊其寵多矣宜有顯效以堅補報

朝散郎李機可知華州制

關西之郡華陰為大居二周之衝道兼三輔之浩穰風俗豪盛獄訟繁多擇人付之乃得稱治以爾幹力可述付茲重委勉思自効用答休命

新差知越州熊本可知杭州制

良二千石朝所甚貴也夫其總千里之寄當一道之重平賦察訟行善備政使下不畏吏閭里無愁歎之聲可以言股肱之美宣力四方者矣具官某早以雋材躋於

法從愷悌而濟之屢斷悃悞而至於無華薦假左符率
致善譽今賦稅出東南二浙為盛舟車之所走集餘杭
居要推擇付汝往哉惟諧夫事無劇易之辨民靡南北
之異惟既乃心斯有成勛夙夜恪居以副休寵

新除吏部郎中章綯可知越州制

出宣使指入居郎臺朝廷之選二者偕重而東南之邦
會稽為大督輸財賦平治獄訟使閭里無歎聲農桑得
其職長民之所寄又宜擇焉吾不以重外為嫌而忽其

治之意以是命汝往惟欽哉

知亳州李閱可知明州中散大夫呂希道可知亳州制
朝廷治民之具備于法令守帥以情視民而用法令輔
之則獄訟可使無撓賦稅可使樂輸不然徒文具無惻
隱之實無益也惟亳暨明皆為重鎮所置守臣未嘗輕
授以某與某悉更久吏咸有能稱是用付茲二郡以期
善効勉力就緒無忝成命

朝奉大夫曹振可權知恩州制

世稱龔遂之為良吏以其乘饑饉之餘安輯齊地也今夫河決水溢汎濫滔陸瀕河之蕩析離居貝邱為當其衝擇守付治汝丁是選其亦以古人為法帥而行之龔佇成效

朝奉郎李察可知濟州制

朝廷之用材未嘗有遺收其來效不追既往期於便安元元從茂風化而已某向承使指兼預戎事雖成勸無聞而宣力為劇既畢親勤肇還籍版是用付委連城之

寄亟居千騎之長東州列壤濟陽為富禹貢鉅野之名
浸漢志昌邑之建國勉崇政術用副寵任

觀文殿學士知河南府孫固可知鄭州制

老成之臣體貌所重殿邦作屏雖曰共治優賢尚德抑
維乃眷具官孫某器度深博謀謨醇厚事上以道正心
不回治民以信善化維敏自均逸於宥密亟報政於蕃
宣惟東里之舊邦實名都之比壤輟司管籥更付郡符
間于二京相望千里河潤之喻冀皆蒙福矣

光祿少卿杜常可集賢校理知梓州制

朝廷之化所以周浹里閭而民情不隔者惟郡將之材
良詔令之宣布也而遐陬之地遠於京師雜有夷貉其
任尤重矧巴蜀之左梓潼為大擇守付委何宜弗慎以
常器局夷曠材術寬裕於以靖安遠俗鎮服荒人其不
為難處之宜矣既更郎曹之峻屬貳卿寺之聯疇其久
次貼以要職麗正之選儒者所榮勉思自効用副精選
皇城使孫昭諫可差知隴州制

總金革之事專民社之寄非有兼材不可兩任以某武
足以守固疆圉文可以聽察獄訟是用付之郡符西當
隴阪專城之寵實為美遷思勤績效以稱推擇

龍圖閣直學士王克臣可知鄭州制

二都相望千里而近介茲舊鄭實曰大邦馮翊王畿屏
翰甸服宜得良守用壯右輔具官某俊德耆明通材強
濟歷試文昌之重雍容龍馬之嚴咨其老成足宣風化
爰付左符之寄俾當東里之奧惟汲黯之臥治洎方叔

之壯猷思與厥齊勉從休譽

朝奉郎韓宗古可知曹州制

人為臺郎出分郡寄受朝廷之精選為儒者之榮遇爾
歷職華省久次自言眷為東藩曹實左輔分以符竹試
其治民蓋二漢之典丞郎滿秩自占大縣以示優異今
爾為二千石其寵多矣勉其民務求稱詔恩

泰寧軍節度使觀察留後李珣可知相州制

朝廷愛民求治之意付之牧守高爵重祿國所尊禮委

之為政上之可以專達下之可以有為於以崇豈弟之
美乃無難矣具官某敏智通徹強力幹濟踐歷周行率
致民譽惟鄴城之故壤實朔塞之要衝民務兵權且將
且守選擇而用元寵貴隆思所副稱以報恩遇

左藏庫副使紀昱可權知廉州制

合浦之地古為珠官琦珍所聚掌握致富宜得廉吏為
之守長且蠻蜚荒遠難馴易擾非夫武壯知略不能鎮
服以是數者推擇用汝祇莅恩寵益思善效

提舉西京嵩山崇福宮范子奇可知晉州知婺州

王彭可知濟州制

昔賢守之為郡或以臥治報政者為其清淨為理責大
指於丞史是以事無不辦此其為奇察繳繞塵身苦志
僅能自既者相千萬矣子奇嚮者屢宣使指陳力甚久
疾病言上求得自便既已數月惜其退處今以臥治之
事付爾大邦晉陽會繁思所報稱惟彭臨蒞婺女民務
自如稍令內徙實為寵命

知晉州郭茂恂可知密州制

長民之官不宜驟易送故迎新之勞簿書變易之弊前世良史固嘗記之矣茂恂治晉纔數月爾當使之久任遂其成績者也會商利者言高密海階宜置市舶以來賈人收其贏餘惟茂恂精力勤恪可膺器使是用易地付之以觀智略勉崇善術副吾推擇

朝奉大夫通判定州胡及可權知吉州制

南州之民穎慧輕急習于文墨易于興訟為之長者明以周

知其情重以鎮抑其浮如是則豈弟之政無愧于古矣某智慮詳敏更歷數事是用擢自倅貳付之郡符江介都會廬陵為右爾其謹心詔條強力民務思有可紀以副遷寵

朝議大夫充集賢殿修撰提舉崇福宮范子奇可
知鄭州制

陪京之右圃田為大當二都之衝道為三輔之繁會加以郡治初復民務至衆宜得良守以興善治惟某精于吏術屢宣使指向以辭疾退就散地蓋昔之能者或卧

而為治是用付之左符俾居東里勿以淮陽為薄所期
東海政清也

兩浙提刑張詢可知越州知濠州林顏可知虔州
唐炯可知舒州制

列郡之治皆以承流宣化為事雖分地有大小處民有
南北朝廷以為共治其重均焉以詢嘗為省郎出分使
指以疾自上求得所便察其餘力固足卧治是以付之
會稽當一都會以顏與炯率更劇任可以繁使惟虔暨

舒皆今名郡好訟之稱被於俗諺列仙之遊或在名嶽
各務悉心以集民譽

少府少監鍾離景伯可知壽州中散大夫李棻可
知耀州制

昔叔敖之興芍陂鄭國之溉關中民獲其利用無饑歲
今壽春華原其遺蹟具存何古人用知之廣而流澤無
窮也後之人見賢思齊不然守其舊規亦足以稱善矣
某久更吏職祿秩崇重今付以二邦之事汝其盡心以

就課最

龍圖閣直學士知鄆州滕元發可知瀛州制

敦詩說禮趙孟之言帥足食與兵宣父之言政朕惟河
朔列鎮將閫攸寄所以外宣國威內輯民務折衝樽俎
收功千城非得材良曷稱付委具官某學古輔志汎愛
容衆臨義而知勇為遭事而能不惑迴翔中外所至可
紀兼資文武每著成效是用移此中都之政付爾河間
之治夫訓士以威則其愛允濟養民以惠則犯難無怨

是乃詩禮之要道兵食之本原爾其勉之母孤寵命

資政殿學士知杭州蒲宗孟可知鄆州制

海岱舊邦皞濟崇祀承伯禽之善俗有中都之餘化臨
按百城控制一道是用舊德以副民望具官某智慮深
廣樞機周密達於從政之方實備老成之美自輟網轄
之任屢更股肱之郡善最可紀餘力深壯輟此全吳之
治付之東平之重夫江湖魚鹽之地其民皆瘼而輕關
爾能馴服之齊魯桑麻之墟其民樸重而好學事將無

難矣勉崇終譽以副休命

新差權發遣泉州朱服可知婺州朝散郎胡宗師
可權發遣泉州制

南方之劇郡泉州婺女並為稱首其民機巧趨利故多
富室而訟牒亦繁其為守者常擇健敏而付之服前以
便親為請今以泉易婺而宗師久吏習事真可以治泉
矣祇服休命思所以稱

河東運副井亮采可知滑州朝奉大夫張璠可知

唐州制

外計之任表率一道邦用莫重於金穀民務莫先於調度智弗及之曠職甚矣爾等前假使傳往益東土不知輕重之要冒無取予之術以致民饑而無以調賑糧絕而勞於發輸責其無狀宜有罰懲黜守一邦是惟寬典右諫議大夫梁燾可集賢殿修撰知潞州制

詩云敬慎威儀維民之則蓋庭有變色則下多悖詞道民之慎何可忽也自古戒之義所不取具官某職在諫

列地參法從不思朝著閭侃之美而忘公門鞠躬之慎
敢肆倍言侵詆同列驚駭物聽虧損國體宜寘深罰以
儆在位稍奪諫垣之扶出守上黨之地尚從貼職以示
厚恩勉自省循毋重愆謫

承議郎侍御史王巖叟可直集賢院知齊州制

朝廷樂聞謹議登進端士其言可用行之無疑如有弗
及亦當忍賞吾之樂善盡美其亦信於中外以某自參
邦憲頗著風論方將稍遷以示褒漸而某猶自以不得

其言引喻請去進取不為元聖所與不及中行未倍直道吾既不汝責備完乃素守付民社之重寄分虎竹之左符貼職麗正專城歷下汝榮多矣思所為報

新差知濟州王彭可改差知撫州制

前守東陽孽火為沴使災青應政汝宜民媚神者淺矣虐焰流及廬舍延燒救護之術亦無聞焉有司議法適會恩降俾從薄懲以儆有土不失專城之任當思省己之效

知明州李萃可江東運副制

財賦之人所以豐國用郡縣之治在乎甄人材監司之任柄是二者民樂輸而無憾吏服職而畏罪而後稱按察之最具將明之美矣以某通材濟務強力任術既崇豈弟之積加以老成之風是用付之漕臺總茲江介其使民無浚恒之歎吏去刻覈之怨而邦用流衍士心知勸是為稱職汝其慎之

彭城集卷二十一

欽定四庫全書

彭城集卷二十二

宋 劉敞 撰

制誥

賜翰林學士蘇軾詔

省所上劄子奏乞外郡事具悉昔之賢臣嘗曰雅意本
朝而以出入禁闥為樂故雖多病亦不願其得郡也卿
以詞學論議朕所虛佇遽請補外將異于古乎約已就

退自為謀者可矣而朝有輕內之嫌重非所宜勉恭職
業毋違朕意所請宜不允故茲詔示想宜知悉

朝散郎太常博士丁騷可右正言制

法語之言抗直之論士友相與或莫能受況夫自下廟
上以義弼主言之非難也惟其信而可復則無訕上之
譏而獲將順之美諫臣之任授受之際其不易矣吾所
慎也某資性溫粹學問䟽達知前言之與往行有直質
而無流心使之正色當朝危言抗議宜無詭隨以違道

亦不訐激以取譽是用擢于曲臺躋之右省伏蒲牽裾
以竚來效

朝散郎右正言丁騫可左正言宣德郎秘書省正
潁州萬縣令充後省刪定官葉唐稽可宣德郎差
遣如故制

修令二省雖未成書而其年勞自當進秩俾其稍遷以
循往例脫銓管之籍為朝閣之漸欽承光寵益自勤飭
尚書右丞劉摯可尚書左丞進封開國伯加食邑

實封制

四輔之地二公覃化王政用為粹美民人以之帖泰具
瞻所寄慎選維重其有德業素著績用已效任賢勿疑
吾以為準具官某全材博厚是為大器純德淵懿至于
積載經濟是任鉅細必宜惟深以通天下之情惟幾以
成天下之務粵繇風憲入承文昌六曹率職以無曠四
海承風而知服今左轄虛位臣鄰莫先宜推已試之功
更示峻遷之寵賜國加賦以符休命噫股肱惟人喉舌

賦政任重道遠匪賢曷充惟爾夙夜浚明以副羣望

同知樞密院事安燾守本官知樞密院事加食邑

實封制

參帷幄之謀據機衡之任折衝未兆眇微必察懔威無
外遠邇咸服是所謂股肱之良社稷之鎮非我舊德曷
籍勇士關決郡務會計金穀必得文墨論贊以為倖貳
故常使監司薦其宜者今使者以爾上聞其所譽者必
其已試往莅所職毋敢廢怠

朝散郎勾當左廂店宅務李敦頤可權通判瀛州制

倅貳之職攸助其長事無不關謀無不預惟協恭而謹信深思而強敏奉上則順帥下則服河間大郡帥府所在用爾為倅推擇而進勉慎職業期可稱述

朝奉郎孫載可通判陝州制

自關以東分陝為重水陸交湊民俗繁多郡治之佐其亦難矣以爾從仕滋久効力可見推擇付之實為妙選

甘棠之詩美在聽訟景行賢傑尚克有立

奉議郎余景可通判莫州制

郡邑被邊兵民雜處應接聽斷其任維重守將之下宜得陪貳以景練歷事務未嘗曠失足以綏輯夷漢寧固疆圉徙置文安勉就成效

通判隴州曾阜可通判邠州潘行可通判隴州制
朝廷之用人常使其優裕樂職無內顧之患則能盡其智力故有嫌者許其自列從其所便則上無掣肘之慮

而下獲伸眉之幸矣爾等並倅藩州克勤民務惟阜避
茲芥蒂與行易地而處宜體茂恩勉圖報効

廣東轉運判官張升卿降一官小郡通判制

蠻越遐阻聲教闊遠所以使王澤達下人情徹上民無
邪慝之咎吏絕苛擾之敝在于監司廣吾視聽智不及
是責奚可逃汝出分使指綿極海嶠而潢池之民恣肆
狂狡烏合之衆圍冒城壘不能覺其萌芽至于繁熾及
至興兵討捕又乏謀策將官使臣恣為威虐良民編戶

多所殘戮論汝不職奚追嚴罰貶秩一等以儆庶官俾
倅小邦佇觀來效勉務循省毋負寬宥

前知華州王子文可差通判大名府制

向分左符出臨劇郡弗良政術頗致人言朝廷未嘗棄
材有以代匱俾為倅職用閱來效夫魏大之區千里畿
甸軍府之盛一時稱雄汝之蒙榮亦為幸矣毋敢以有
命為說怠墮人事仍取咎戾也

宣德郎知京兆府長安縣王鑒可權通判岷州制

西方諸郡外禦羌戎兵事民務應接非一惟守將之重
宜得欽助故敕漕臺舉能者而補之今使者以爾來上
譽必有試來效可期錫爾新命勉崇善最

奉議郎監粳米第八界黃思可通判大名府制

魏大之為都會而管鑰在焉尹正之重欽助惟難爾以
材選粵當時任宣布詔條盡力民務有以自表用副朝
寄

宣義郎向宗傑可權通判安肅軍制

西北州郡被邊者非一倖貳之官不調于吏部而中詔
親授之所以為慎選也今以安肅付汝無以私壘為小
怠於戒儆無以葢邑為易慢于刑政戒之慎之實副寵
命

新差通判滄州劉撫可通判定州制

河朔重鎮威總兵要而稱帥府定為極邊益加重焉倖
貳之職厥惟艱矣爾前以掄選倖于渤海今徙之中山
地雄望崇宜有以稱之毋致弛懈以孤休命

朝奉大夫保信軍簽判蹇序辰可差權通判滁州

制

案蹇序辰父周輔曾知廣州故制中有壤地相接雞犬相聞之語

前為諫臣黜而仕郡思愆補咎為日已久朝廷未嘗棄材必有稍遷俾更倅守仍付便郡而父為一道之帥壤地相接雞犬相聞爾知其為榮乎勉務恪居毋孤寵命承議郎充秘閣校理梅灝可通判杭州制

朝廷以學術選士政事課吏其能兼備者可謂才良矣爾警書東觀始以文進今復命爾倅貳劇郡試其為政

東南都會惟杭為大謹奉詔條深察人情事將無難民
譽可致也

承議郎余景可通判信安軍制

仕宦者以資級為階州城軍壘夫何間焉然為副貳者
奉上使下皆宜有度疆場外禦兵戎雜處汝既更之矣
益思勉懋

趙濟可降一官差唐州酒稅制

因緣材選得任邊寄力不能強毅威敵廉不能清白率

下而耽恣博戲牽強僚佐自處必勝衆莫敢校責其償
進過於奪取無恥至此為辱已甚宜從貶秩之罰以肅
慢官之咎酒榷市征之繁足以効力克已悔過尚能自
返

龍圖閣直學士朝奉大夫提舉南京鴻慶官盧秉
可落龍圖閣直學士依前朝奉大夫充寶文閣待
制差遣依舊制

王者視民如傷故常有不忍之政為仁不富故常推陳

錫之惠豈其作法于涼歟怒為德使淪胥之酷被無知之
之眚哉具官某往以淺謀建為邦計紛更約束峻列科
指見小利而欲速推忍心於必獲密網布設購賞積重
牢盆之饒其登籍者無幾累紼之害或連坐者半道東
南之民父子不保事雖已往謗者未息宜示深懲以戒
惡吏奪龍馬之峻秩仍琳宮之舊守尚為寬恩宜自循
省

知制誥吳某可加勲封食邑制

詩云濟濟辟王左右趨之蓋上帝之祀以顯相為美在
廷之臣以與祭為慶禮成于上澤施及下古之道也朕
無間然具官某直諒多聞靖恭守位論議合五諫之旨
訓詞得三代之風茲朕寅修禋祀對越穹昊惟爾鳴玉
以相奉璋攸宜方熙事之備成既大賚而錫祉亟頒寵
數以復厥勞開國書勲實有常典膺受恩遇毋怠欽承
知制誥石某可加階封食邑制

古人有言天子之尊惟其以公卿為正長子男為師旅

也國家賓禮近臣隆厚寵數開國錫命備存彞典具官
石某向以美材進昇右掖服勞侍從之事贊襄禮命之
書朕以寅祀昊天大賚四海凡列位著畢與慶賞惟爾
間望簡在朕志庸舉舊章亟疏新命兼官崇峻封邑陪
敦班寵有加名數偕異祇服優渥無怠厥心

四蕃大首領鬼章可陪戎校尉制

嚮以強梁寇犯邊圉稔惡盈貫係繫來獻朝廷隆好生
之德廣柔遠之略被以厚恩貸其萬死分其種姓之息

嗣部族之黨類既知服罪咸願乞恩宜崇盛典以收來
效俾脫藁街之戮仍賜漢官之命膺霑殊渥母貳乃心
右屯衛大將軍知潞州郭達可觀察使知河中府
制

禦侮之臣嘗以一眚致咎矜其舊力收功未路爰疏茂
恩以示殊渥具官某武節自劾智謀有取嘗位樞府亦
分將閭留落不偶蹉跎暮年不能復鴈門之寄亦足深
東武之歎宜復廉車之秩仍分符竹之榮勉爾激昂報

我光寵

皇伯均州防禦使世雄可觀察使制

九族惇叙所以隆公族之恩三考陟明所以謹外朝之
治非夫飭躬自喜辟咎無疵亦何以克播休聲膺受崇
錫皇伯具官某地居近屬身載美材闕廷覲見之恭未
嘗曠失宗室信厚之譽足為表儀舉其年勞詳案令緒
宜示展親之典用伸加秩之榮進假廉車茂宣使指寵
光之盛負荷實艱惟匪懈可以終譽惟謹度可以持滿

勉焉慎思毋墜休命

朝散大夫致仕趙宗誨故父任給事中贈司空賀
可贈司徒制

宗祀覃慶無間幽顯矧為著名前朝詒法後裔宜加異
數以慰幽壤具官某父某德操修立著聞縉紳官闕顯
榮驟躋責瑣既緣子貴追賁公哀進陟教官之長用為
泉室之榮魂而有知歆此殊寵

故永嘉縣君姚氏可贈榮國太夫人制

宗祀均澤無間幽顯矧其德著閨門慶垂後裔宜加異
數以慰下衆具官某母某氏慈淑自修窈窕著稱旣緣
子貴肇啓郡封進錫綸翟之華益為壤戶之寵尚惟陰
魄歆此恩榮

禮部員外郎郎安詩弟司農少卿安持故父任觀
文殿大學士吏部尚書贈太師開府儀同三司追
封舒國公充可追封曾國公餘如故制

股肱之臣社稷之鎮累功積行克永終譽生榮沒哀兼

極休命粵因大賚申隆贈典具官某父某事君以道謀國以忠經緯王度調飪鼎實利澤施于海內標矩存于士林臧孫宜其有後二惠迺其競爽蓼莪之報明發載懷屬此合宮之祝覃彼漏泉之澤追崇麟野之封增賁龍章之服尚惟幽壤備歆光寵

通議大夫致仕李及之故父贈晉進邁可特贈開府儀同三司故母華原郡太君張氏可特贈榮國太夫人大中大夫致仕程珣故父贈吏部尚書邁

可特贈特進故母孝感縣太君張氏可特贈廣平

郡太夫人制

宗祀均福普及幽顯所以昭孝德之光于四海亦不遺
小國之義也夫為善在躬鍾慶于後閨閭之休後昆貽
慶源流深永本盛枝茂慰其蓼莪之心申以漏泉之澤
李及之父開府之貴禮視上公程珦父特進之貴位次
上公錫茲密章增顯幽壤李母某氏親封大國兼采美
郡程母某氏湯沐之邑疏以郡封雖不及魚軒之華姑

畀以蜜章之寵

燕國太夫人某氏可特封周國太夫人制

愛敬盡于事親孝弟在手錫類是以明堂之祀大賚溥天之澤凡預周行咸此報德具官某母某氏令儀懿行是為女師象服魚軒既從夫貴暨以君羹之遺益為子舍之榮茲因受釐之成俾申來諗之志啓封大國書社成周崇是寵章用疇慈訓

左藏庫副使致仕王慈龍圖閣直學士朝議大夫

工部侍郎克臣父可贈左金吾衛上將軍母可贈
普寧郡太夫人制

合宮祔祀大賚子衷照天涌泉靡不周普以某等故父
某故母某氏天裔之出邦族之彥鍾慶後昆克生良子
尊列朝著應受顯服慰其明發之思申于幽窆之寵執
金近衛普寧大郡視亡若存哀榮備矣

國子祭酒集賢校理鄭穆可直集賢院充諸王府
侍講制

昔東平王有言為善最樂時主稱其言之甚大史臣載
為美談夫以經術為意聖師之教日陳於前左右勸誦
溫故知新此其為善之樂其益茂矣今吾賢王蹈之求
其端士舊僚以望其府惟某端懿淳諒博通藝文其在
秘府綽有令譽還之講席以輔美志增麗正之峻職為
儒者之榮觀宜思恪居用疇休命

職方員外郎黃景可楊王府侍講制

經術造士所以貴於儒林之官又況其勸講賢王曳裾

大府其為慎揀良可知矣某幼壯好學者父稱道輟自
臺郎之選俾從楚醴之游正心博古務崇職業

承議郎張獻可太學博士制

博士之選為人師者也身帥以善豈特經藝廣習而已
乎以某前歷郡宰頗崇善譽使居太學誨誘貴游孰曰
不宜其勉之哉

試太學正吳師仁可試太學博士制

講誦師言訓道國子太學之官未有位著於朝而以道

藝為勝實儒者之美仕榮遇也不以貧賤為恥不以留滯為歎惟有志者充之然國家選第吏課選叙有等由學正而進博士是亦疇庸尚德之謂汝膺是選勉服休寵

監察御史楊康國可開封府推官制

京邑浩穰獄市攸繁為之長者挈提綱領於上宜得攸助張羅衆目於下以爾材具修整應物知務肇為御史休有佳稱使之貳官京兆宣布詔令宜其裨益足副遴

還

朝請郎工部員外郎石麟之可開封府推官制

邦畿千里人以億計使萬室焉有一氓之訟不為多矣而不可勝聽也京兆之屬吾甚重之以某久吏老成居有善譽徙置幕府宣布詔令畫婉決繁足以期待

開封府推官制

王都千里之畿輦轂五方之地民庶雜處情偽萬端聽訟察詞發奸擿伏尹正之重其貳唯難以兩學通古今

材任繁劇藝而達則從政乎何有強而毅則臨事而屢斷是以擢於三館付之會府爾其虛心以輔畿右由表以審羣情粵其慎守以永終譽

才人馮氏父贈駕部郎中紹可特贈朝議大夫母
崇德縣君李氏可特贈仙居縣太君制

積善在躬鍾慶重後克生邦媛列職婦官屬宗祀之受
茲塵迨溥天而均福漏泉之澤及幽莫遺宜峻寵章以從
贈典毋宜易名城以隆贈典

蕃官內藏庫使騎都尉李阿理可特授皇城使封
清河縣開國男食邑三百戶制

朝用覃慶溥及微細爾預列官次例宜進秩東班之首
使聯為重開國賦邑併增異數祇莊戒懼以荅休命

觀文殿學士知鄭州孫固可兼侍讀提舉中太一

宮制

朕博覽前載以求多聞惟古今治忽之原賢淑經綸之
要粲然方冊可從稽考思得龐碩備于顧問具官某氣

質渾厚心慮開敏挺然素絲之節至于黃髮之年既嘗
歷位樞機陳謀幃幄忠言盈耳謹議協心是謂老成宜
在法從俾造虎門之詔以緒金華之業庀職殊庭增嚴
整事勉服休寵副予簡求

知慶州范純粹可寶文閣待制再任制

封疆之臣是付方面之寄詩禮謀帥實得中權之要折
衝禦侮不違尊俎之間知名勇功乃居繩墨之外朝有
懋賞吾不汝私具官某智慮開爽量力宏厚正固以嚴

戎律忠肅而得士心好謀而成從善無厭自昔分閭綽
著威名隱若千里之城晏然三歲之戍敵情屢効邊烽
無警宣疇異庸進擢優秩登延閣之妙選仍青油之重
任軍中立號以勵虎臣省戶我冠無負儒服恩榮並進
汝其念哉

太皇太后殿楊氏等夫人進職制

聯籍東朝承恩內闕備茲斗秩無違宮事屬中宸之奉
冊方庶類之蒙慶宜覃恩渥用賁光華

太皇太后殿張氏等四人進職制

上冊長樂是為大慶加惠小星抑亦前烈惟宮事之嚴
密矧司存之等差祇服恩榮毋怠勤恪

龍左氏等十一人進職制

某氏等咸以貫魚之序親際從龍之會依日月之融光
宜雨露之溥及稍躋女御悉有司存祇服恩華益思勤
恪

大理正燕若古可國子監丞大理寺丞李舉之可

都水監主簿制

九寺之職事治獄為劇爾等皆莅官大理是已試於其
難者屬此官罷徙爾他局夫猶斧斤之於攻木根節可
解若其餘則易而無滯國庠總胄子之版都水主溝洫
之事以其明辨何有弗治毋曰弗類勉力自効

宗正寺主簿王柄可太僕寺丞朝散郎張向可光
祿寺主簿制

九寺之屬位下而秩薄然皆朝廷慎選可以漸於榮途

矣以某等為吏有嘉聞敎而用之宜自竭力以副寵命
朝散大夫衛尉少卿韓宗師可直祕閣提舉鳳翔
府太平宮制

公卿之世能以修行自立朝廷之所尚也為其承紹世
美而可惇勸顯官豐秩夫何吝焉爾儒學吏能皆有可
紀至其色養不違仍信於人向嘗擢登書館退避不就
屬乃父告老得謝朝有著例復申前命以旌才良輟卿
列之副貳總殊庭之釐事祇服休寵益思勉勵

朝議大夫知密州王說可知涇州朝奉郎集賢校
理鮮于師中可知鳳翔府制

邠岐二邦皆國重鎮內修民政則良守之事外愴威聲
則名將之略朝所付予是焉慎重以某出於鄉族屢膺
藩寄以某向更戎瑣嘗著能效並付連城之寄列居千
騎之長夫中和豈弟所以愛養南畝嚴重明果所以董
正師壘勉力勤恪以副推擇

西京左莊庫使高道禮可知安肅軍莊宅使文州

刺史朱衍可知全州制

朝廷聲教化及朔南屬在邊隅奉琛面內而邊圉之在
仍所戒儆常擇良守以屏要郡爾等咸以知畧夙備推
擇宜付左符之寄益示專城之寵北抗河塞南極湖湘
治民訓戎事惟一揆勤力匪懈以就來效

知南京王震可知荆南知湖州林希可知南京制
方面之寄所以屏翰百城郊圻之重所以保釐千里朝
所付委二者惟均材之所宜試可乃已震學以知務智

足應物希心慮通達文采彬蔚而皆詳究吏術輝赫民譽在此無數去常見思夫荊州全楚之舊也震往拯之以宣布于蕃之治睢陽王業所興也希就尹之以陪輔維則之化並膺休命益思要術毋有怠忘用副銓擇

知趙州杜紳可知濱州太僕寺丞朱勃可權發遣

虢州知濱州張奕可知趙州知虢州張仲容可知

建昌軍制

吏治弗修民用離散輕去田畝起為剽奪此豈元元之

素心哉吾甚閔之號略關西之巖邑渤海東齊之奧區
二邦之人今或失職汝紳汝勃以幹敏著稱是以選擇
往莅撫之昔太叔誅萑苻之盜以安鄭國以猛治者也
勝之而已而龔遂謹農桑之課以厚齊俗則允安之是
為美焉景行前人庶必有立夫事上者不一其宜亦有
工于此而短于彼度材而處孰不致治惟奕與仲容試
吏之久俾其易地勉思竭力

何萬聰男思遷承襲制

歸義向化歲月綿久年齒耄老求自便安願以州額付
其長息宜聽承襲以光種落

向思越姪載舜承襲制

思越之亡子當承襲以病自上求與從弟不失種族而
付印章有義存焉宜從聽許汝以非次驟膺厚福祇服
恩寵毋敢曠怠

故岷峒都巡檢向思景男載舜承襲代父名目制
向載舜父為漢官忠順自効今也則亡義當置後爾以

適嗣法當承襲撫綏部族庇育族屬體茲恩寵當盡報効

銀青光祿大夫檢校國子祭酒充溪洞恭順知州

兼監察御史武騎尉田洪獎長男思世承襲制

徵外向化膺受天爵父歿子繼厥為著令肆爾承襲不待功効惟盡忠孝無忝崇寵

宣德郎太常博士楊國寶可成都路轉運判官制
博士儒者之選也國寶居之衆以為宜而大臣薦其博

學可使在讐書之列國寶辭不肯當而薦者益稱其能
夫士之好古屬文信為美矣豈若施之政事有以澤民
之為懿也今以國寶為刺舉之官付之百城之任凡其
財用之所興出官吏之所分部舒慘澄汰其務非一蜀
端遠於京師朝廷之所眷顧慎爾智術副吾遷擢

奉議郎安惇可夔州路轉運判官制

前奉使指往蒞左蜀未及報政以憂解去既畢祥琴復
還仕版粵假傳車之任佇俟將明之最古賢叱馭求為

忠臣爾勉之矣

朝散郎虞策可荆湖西路轉運判官制

荆及衡陽洞庭之阻漕事之轉京師其行永久列郡之富百吏之治遐遠幽隔又當周察使者之任其重矣哉以某幹力著聞前在蜀道職業未究今復付以八州之寄宣布恩令思稱任遇

朝奉郎江東運判劉極可淮南轉運判官制

將曹之重號為外計澄察百吏則上之目目均節九賦

則國之淵藪然用吏之術久次則其效乃顯爾前在江
介即有成績今復付之淮甸益觀遠畧祇服休寵毋怠
初志

新利州路運判溫益可湖南轉運判官制

湖湘之阻遠於京師所以惻恤民隱宣布上恩惟使者
為能副本朝之意前以其為巴蜀今徙之南州體予推
擇之慎宜有恪居之效

朝奉大夫新權知撫州鄒軻可江南東路轉運判

官制

將王命之出內明邦國之若否使者之寄為朝耳目誠得其人列城受賜以某歷試民事舉集時譽今賦稅之出江南為重所以使百吏畏法四民就業將漕有序歲計充牣選擇用汝宜勉之哉毋墮職業以孤任遇

彭城集卷二十二

欽定四庫全書

彭城集卷二十三

宋劉攽撰

制誥

朝散郎大理卿杜紘可朝請郎奉議郎試侍御史
王覲可承議郎餘並如故制

刑罰所以輔治法令在于便民惟將明之材知所筆削
而哀矜之澤由是布宣嘉其成畫用推懋賞具官杜紘

通知法意詳練時務具官王覲天質精敏儒業該茂而皆持心居厚觀物能察討論五刑之中究極三典之要輕重適宜簡易難犯新令肇布大綱衆明疇其恪居錫之異數加秩進等是為寵光益圖報稱

奉議郎陳向能可承議郎置

郡邑被邊中外雜處加之遠人新附應接多務為吏者比及三年事整而無曠可謂能矣是以賞典及之爾參釐幕畫其效中率進秩一等以疇勤勩

宣德郎曹旼可通直郎制

朝有大慶賚于四海百官進秩雨露之澤也爾預于甄叙通籍朝闈榮親顯家其賜盛矣服此休渥毋怠祇肅

允劉安世可右正言制

侍從之臣朝之精選諫爭之職士所深願為其班著在日月之際論議有耳目之助上之用人既其甚難下之自達固亦匪易惟忠信篤厚乃能當其任矣隲庀職右垣綽形善譽安世讎書中秘素著高節足以膺此慎東

並處言路爾其迪上以誠明之德修己以純白之操進
不為名退不畏勢使人曰邦之司直不亦善乎

承議郎盧訥可通判德順軍制

州郡被邊皆于襟喉之地故雖褊狹而澤人甚艱倖貳
者佐守之職政無不關其在邊之選又加重矣爾以才
畫可稱宜膺繁使付爾軍壘勉思勤蓋

承議郎通判鎮戎軍韓宗哲可通判大名府制

朕以北都圻甸居宇之重而河防之役方復繁夥故以

旄鉞付樞機舊臣使司管鑰又惟其佐貳宜所慎選某
幹畧堅挺見于職任是其遭事當不避難奉長當不苛
合善治之效可跂俟也以是命汝敬慎毋怠

奉議郎楊紹可通判蘭州制

邊塞之斥西路逾廣金城之地襟喉夷漢選將遣戍常
膺重寄具官某器大有容材茂兼濟資忠厚以為質兼
博闡而輔志仁為已任毅而不同惟幾成務其施逾博
粵自先帝擢躋右府智名勇功足究子房之事忠言嘉

謨加著君陳之美宜正斗樞之拜以副薦紳之望書社
真食併增異數將使蠻夷率服金革不試在夫謀之減
而下丕應氣之和而衆知悅此吾制治之本任賢之心
勉而行之以副虛佇

通直郎太僕寺丞高士英可工部員外郎制

百工之事萃于冬官屬郎之選是宜遴簡以某効職輦
轂克修馬政風績壯敏宜所進升俾陟文昌之府以觀
驥力之效

朝散郎陳知新可知華州承議郎張景溫可通判

荆南府制

守倅之任有地千里承流宣化推廣上恩興利除害究
度民事有志之士所願為也馮翊右輔江陵故楚生齒
之盛厥為名藩擇材而處以命爾等或守或貳思所為
報

開封府推官羅適可府界提刑前河東提刑范子
諒可開封府推官制

邦畿千里王化所先內有幕府參預謨畫外則節傳督視縣邑皆為劇任宜付能者以適強力民事知其要務方疏治畝澮僅其就緒以子諒前奉使指按刑無煩是用並從推擇付茲浩穰詳獄岸之巨細察民情之真偽其亦無怠初心是則動罔不獲

宣義郎徐壽可宣德郎添差福建路轉運使勾當
公事制

縣令之職愛民者也賦取有不便能以固爭于上使者

非其人能以拒而不顧守正不奪見黜無悔如此乃為
稱其職夫汝允蹈之去思在民歷久不忘淹滯歲時百
爾稱頌重因薦書之上將勵素飡之輩增秩一等隸屬
外臺興利除害隱卹民病悉爾初心其必有補矣

故捧日左廂都指揮使張元孫彥訪可二班奉職
制

卹孤延賞朝有著令乃祖為國爪士歿身旅帥資其餘
寵及爾童孫敬服休命思所自立

借職秦威弟戍可三班借職制

哀死卹孤朝有常令兄亡弟及抑為殊寵今以俾汝敬服休命

趙子諒等三人可右班殿直王楹等十四人可三班奉職制

朝廷設科以求材武弓馬程其藝能策畧觀其趣向二者俱茂可以當勇爵而承器使矣爾等咸繇舉薦得備廷試實副其名朕甚嘉之品差授官用示旌勸祇服光

寵益思奮勵

皇叔故皇城使榮州團練使仲輅可贈密州觀察
使追封高密侯制

公族之愛戚疎有倫存垂惇叙之休沒著哀榮之典情
禮所極爵秩何遘具官某地居近屬仕齒外朝修身有
聞從政無曠奄至不淑為之傷懷宜推加贈之章亦示
為善之報廉車侯爵并疏茂恩魂而有知歆此殊獎

皇叔故右武衛大將軍惠州團練使叔鮑可贈鄆州

觀察使追封東平侯制

繇葛藟之庇襲麟趾之慶進總環衛分領使符修身有聞得譽甚美降年不融大命遽及傷悼之懷宜有以稱廉車為專城之重侯印亦分茅之貴大邦須句并茲卹典尚其有知歆此殊寵

皇伯濮州防禦使叔果所生母仙源縣太君張氏
可贈永嘉郡太君皇城副使孫懷用母仙居縣太
君王氏可贈崇國太夫人制

合宮必祀率土蒙慶幽及泉壤崇其爵號所以慰天下
為人子者之心而昭國家孝治之至也具官叔果所生
母張氏實生令子齒于公族由其鍾福垂裕克家顯服
既疏湯沐之封以厚蓼莪之報俾更大郡仍協令名魂
宜有知承此休命具官孫懷用母王氏實生令子陟于
朝著由其鍾福垂裕克家顯服既疏邑封以為湯沐而
夫貴已隆贈典宜進特從賜國增視魚軒魂宜有知承
此休命

承奉郎趙令斟可南京簽判制

詞學登第既躋膺仕又將試之民務究其心術別都居
留幕府甚重以爾從事茲謂美遷宜當悉心簿領之最
豈特曳裾樽俎之間而已

通直郎新差通判興國軍沈季長可差充揚州簽
判制

朕矜爾棄咎既示甄敗更擇名都改佐幕府稍遷安便
其益懋哉

神宗皇帝御侍五人等守永裕陵迴内王氏與掌
闈夫人劉氏與掌賓夫人李氏與掌飾夫人制

朕惟先帝衣冠既藏弓劍逾遠凡此女御經侍寢園送
往若存慎終加敬逮隙駒之邁邁瞻望田而若疑俾疏
渥恩悉進品秩祇服光寵宜謹欽承

故尚宮吳氏可贈安定郡夫人制

早服貫魚之序端習彤管之訓生著柔範沒存懿稱特
推愍策以示恩典擇名城于大郡加寵服于榆翟尚惟

有知膺此休命

入內東頭供奉官梁和米遵可並供備庫副使轉

出制

効職中侍功次當遷雖寓官資固為明陟今而補外并
疏恩渥使聯之重介貳惟寵祇服休命益思勤恪

通直郎孫進可國子監主簿制

國家開廣庠序學者其至雲委故學省備官而主簿之
職清且要矣爾家世儒學既習為吏使膺是選良謂稱焉

益務勤修以副銓擇

皇城使漢州刺史廣南西路兵馬鈐轄同提舉本
路巡檢溪洞公事張整降三官添差充江州監稅
內殿承制閤門祇應知融州溫曷降三官添差充
欽州監茶鹽酒稅左侍禁管勾融州臨溪堡事兼
地方同巡檢杜震右侍禁權邕州臨口寨鍾仲仁
各降兩官制

中國之所以臨撫戎蠻常以威信結服其心豈其夸于

殺人見小利而起後害乎爾等咸以選擢見任邊徼貪
于首功輕肆剪裁無辜橫死近二十人文書自營謾不
以實覆案究極惻然傷嗟宜正典刑以慰遐僻差奪官
秋用懲無狀尚體寬恩思自悔咎

太府寺主簿韓宗本可大理寺主簿馬傳慶可太
府寺主簿制

太府謹出納之總廷尉主決讞之事為職不同程材亦
異然精心恪居者亦何處而不宜惟宗本以親嫌引避

與傳慶易地而處其各勤慎職業以就功緒

殿中侍御史韓琦可左司諫制

獻可替否陳善閉邪二者所當納君于道致國于治能至是者其惟良謀者乎具官某資質端茂諭議開爽簪筆殿中執憲法司久有諒直之譽是用擢躋左省參聯七列尊其所聞則義無不貫恕以及物則厚不可勝正色立朝勉之慎之母替朕命

殿中侍御史豐稷可右司諫制

在廷之臣位下而望重者唯諫官而已為其得廟切人主紀綱國體也然非其學足以達道其智足以周務見微而知著擇善而有容亦安能稱其事而宜其官哉以某自居憲府綽有士譽名不虛得材實允副移珥筆之權當伏蒲之選讜言正色迺其素守吐剛茹柔毋愧前哲則我為知人爾號稱職矣

殿中侍御史呂陶可左司諫兵部員外郎賈易可
右司諫制

官以諫為職者所謂以義致身以道事上者也將順其美補助其闕耳目之寄孰重于此乎以陶風力幹濟守正不回率職中臺屢形讜議以易學術精敏好古自喜效官南宮綽有令譽是用躋之二省之聯付以五諫之任爾其慎慮竭已正學廟上副吾簡求無奪素守

宣德郎濠州簽判包綬可少府監丞制

昔臧僖伯諫君君子謂其有後忠讜之士所崇尚善善及子孫理亦宜之爾父陳力前朝扶義個儻搢紳之論

于今弗忘而某亦能修身自立素風不墜元宰大臣為之建言吾所樂聞亟使進秩丞飲列卿効智都輦用觀爾能期自恪慎

朝奉郎行都水監主簿陳安民可都水監丞制

吏習于事者可以勸功爾効職都水其已久矣因而遷之乃宿其業與夫初試未習者固有間焉勉崇著効毋孤寵在

刑部侍郎龍圖閣直學士呂公孺可權知開封府

制

五民雜有是為浩穰之區四方維則實曰風化之本尹
正之任推擇攸艱具官某志剛而氣果材博而智敏効
力周行莫非重寄剖符大邦分閭邊圉率有治最稱為
吏師是宜付之衆大之居究其豈弟之化昔廣漢鉤距
察人情延壽恩信周屬縣能者之事何遠之有

寶文閣直學士知蔡州謝景溫可知潁昌府制

部京之南許昌為重昆吾舊宅之地是曰大邦先朝啟

封之始因建赤府連七城之會繁當一道之綏輯其所擇守未嘗輕付具官某老成之德中外將更治民之材所至可紀宜換符竹之寄俾分璧田之興忠臣之義乃心固在于王室良守之事可以蒙福于京師

陝西轉運副使葉康直可直龍圖閣知河中府制朝廷之用人勤者有以報之勞者有以休之要區劇任常使迭處爾將漕陝服歷年于茲金穀之用無乏羌戎之警鮮上結課之最朕用嘉之惟蒲中之要藩居三河

之勝地擇守之慎得人攸艱付虎符之優寄增龍馬之峻秩寵勤休逸并以資汝勉服休命益圖來效

新知秦州孫覽可知河中府制

龍門河山之固見于前載今為大府實一都會賦入之繁夥軍旅之走集其地已重擇守奚易爾資性平曠遇事通敏外宣使指內佐省轄洵著能名允膺繁使易地隴上徙治蒲中漢之三河此為大郡循良之稱屈數為多勉務風績以追前烈

資政殿學士知鄆州蒲宗孟可知河中府制

嶽牧之任是謂維藩股肱之郡尤所精選具官某早以
周材進歷近輔均逸居外偃藩斯久政術優裕民俗畏
服顧以墳墓為念桑梓是恭求易便郡頗慰明發朕惟
體貌之重從欲是宜付蒲阪之興區當三河之都會敬
服休命益思遠績

資政殿學士知鄭州張璪可知河南府制

三川之地二代餘俗內守宮闈外奉園寢居留之寄慎

選所先具官某智實周務器維華國謀謨著于廊廟功
業見乎舉措柱石之資民望惟允絲均逸而居外既報
政而上聞爰付玉麟之符以總日圻之重宜其惇懋風
化用拯陵遲

龍圖閣直學士朝奉大夫盧秉可知荆南府制

君子不奪人之親使之遂服先王之制既不可過門外
之治有以揜恩具官某早以才化參于法從聯龍門之
秘遂總戎閫之會繁吏最亟聞親喪致事不呼其門于

今三年祥琴始終仕服宜復眷南荆之興壤居金楚之上游剖符列城表率一道祇服光寵益思恪居

寶文閣直學士知揚州謝景溫可權刑部尚書制百官之本係于尚書六曹之長稱為八座朕慎選其人每加遴柬益嚴試可亦無虛授具官某稟性剛特為學堅正綿歷中外浹洽聞譽察民情之真偽練國體之詳要是宜付之秋官之任執此邦典之中噫論法之失或以便文而忘惻隱之實好生之德乃在盡心而得哀矜

之旨慎爾官守副吾休命

朝請郎王子琦可衛尉丞制

中外之任非有重輕惟才所宜而後付與爾更歷州郡
既有善績觀光于朝貴于爾近是以擢丞衛尉効力輟
下欽承休寵勉就職業

朝請郎溫俊又可大理寺丞制

決平獄事下無免人作士之重所以使不犯于攸司欣
助之官丞居其一以爾材力通敏大臣所稱擢而用之

其必有效宜自奮勵以光任遇

張番龍進奉使將軍制

慕義向化獻琛修贄誠款可取孰賞宜及並從懋賞以
榮種落或繇卑秩稍遷品列或起徒步而加爵服咸思
忠孝以酬光寵

左司諫朱光庭可左司員外郎右司諫王覲可右
司員外郎制

朝廷開直言之路延諫爭之臣其能愛君主于信厚論

事識其大體不為苛察以取聲譽而補益之效粲然可見
宜有褒崇以顯尤異惟觀學問端邃臨事屢斷惟光
庭氣宇惇重見義不回並列二省有光七列文昌之為
政本都司之有屬郎尤思得人以齊衆務俾從遷秩復
使効材

左司諫韓川可太常少卿制

諫諍之臣以讜言悟主禮樂之司以制度輔化皆當精
識好學乃能勝任故宜于此者可以進于彼矣具官某

智慮通敏文采淳正自歷風憲之司以及諫垣之列忼慨大體激昂壯志資其餘論可謂盡心移其直清足以典禮宜付秩宗之貳用觀儒術之效

朝散大夫左司郎中范純禮可太常少卿制

晉侯霸者首正執秩之典漢祖馬上亦先叔孫之儀禮樂之治古今要務于其司存必付能者某生于名族幼有令聞忠信可以學禮文雅用之飭吏屢從器使皆得士譽宜寘奉常之貳俾主曲臺之論至于通古今之變

使無膠柱究情文之說不為聚訟是勤職業用副獎擢
太僕寺丞高士英可府界提點制

都畿之廣縣邑綦布在周則規方千里于漢則開置三
輔至其聽察獄岸調度官用何嘗不選擇使者宣布上
恩以某敏惠於事久結吏課宜付傳車之任以觀美俗
之效

天武右第一軍都指揮使通判刺史聶達可左屯
衛將軍致仕制

朝廷之于羣臣壯則取用老則安存休息之所以全其
恩厚也汝以武力為職至其耄老不可復任以事仍錫
餘寵用光暮齡環尹之崇實為異數

虎翼軍都指揮使寧州刺史張明右領軍衛將軍
致仕制

効力虎旅恪恭師律今其年至宜使休佚擢環尹之寵
號為掛車之餘榮蒙被豐恩知其優渥

新授常州司理參軍孟三英父真可承務郎致仕

制

夫貴老尚齒所以勸天下之為人子者也是以赦令之下常及高年粟帛之賜既有秩次九十者復命以官此朝廷恩禮逾於前世矣爾以暮齡膺茲寵數內為子孫之榮外為鄉里之觀逢辰之幸其亦至矣

承務郎致仕張穀可承奉郎致仕制

引年致仕弗及以政而慶賞之典與在朝者均國家養老之禮所以隆於三代也爾以暮齒膺此光寵既為幸

遇亦酌素守

承務郎致仕魏中庸可承奉郎致仕制

告老謝事退居里宅勤勞之役既不汝及朝有慶澤顧不汝遺貴老尚齒惇篤至矣蒙是休顯汝知幸焉

通直郎李周可奉議郎致仕制

告老之臣弗及以政慶賞之事遐邇不遺以是朝恩追於耆耄惟汝黃髮膺我殊寵是誠幸遇毋忘欽承

宣德郎致仕呂昌符可通直郎致仕制

以年致政閔勞以官職之事而慶賞之典亦不汝遺朝廷貴齒敬老之風厚矣升秩閨籍有列位者得以追贈其先不其貴歟然亦為吏廉勤無咎之報也汝知之乎

儂應卿可三班借職充歸州巡檢制

乃父為國守邊外禦夷獠而以疾病不任需章來上仍述知子之內舉庶幾幹蠱而克荷宜從錫命以靖遠毗
承議郎翟思可祠部員外郎制

尚書屬郎皆擇端士其進既難而其用有漸以思敏識

深慮見稱于時宜備建禮之朝仍付冰廳之選勉勤職業以稱推擇

行門崔琪等七名授官制

國之爪士居守王闕拱衛軒陛之嚴耆竭股肱之力積勞可叙甄賞宜加因其執射之後先以為賦祿之等秩膺戎光寵勉爾恪修

又

七萃之士為千夫之長治衆以整訓勇知義隊師之選

材武是艱爾陳力軍和茂聞批政叙遷園校用錫茂恩
加團結之雄名壯貌貅之重望益崇來效毋棄往勞

又

國家開設勇爵養育戎昭壁壘星陳偏兩鱗次戰多則
懋功疏賞平居則用勞次遷所以一內外之志齊上下
之分爾陳力維舊叙進是宜齊衡五符踵武官帥壯貌
貅之重望假符竹之雄名思渥之隆敬慎勿替

朝請郎解補建故父任尚書刑部侍郎致仕贈金

紫光祿大夫賓王可贈特進奉議郎王詔弟奉議
郎復故父任給事中天章閣待制贈銀青光祿大
夫舉元可贈特進制

能仕教忠良父之事立身顯親孝子之美朕嘉義方之
成訓矜欲養而不待弗恡高爵以隆贈典具官某父某
生膺顯秩歿有餘烈肆其後嗣服此朝采因釐事之告
休沛豐澤而追遠特進之貴位次上公宜加蜜章用賁
幽壤

朝散大夫宋惠國弟朝奉郎輔國弟朝奉郎奉國
弟朝奉郎服國故母豫章郡太君劉氏可贈榮國

太夫人制

合宮毖祀溥率蒙慶惠澤所加無間幽顯然非積善之
門世有令人亦何能霑此優渥無愧泉壤也具官某等
故母某氏婦順著聞母儀修整諸子伯仲同列簪裳褒
贈之典實慰孝思緣其父之崇貴宜厥配之休顯粵疏
名邦申錫象服尚惟冥漠潛喻光寵

大中大夫致仕程珣妻壽安縣君侯氏可特贈上
谷郡君通直郎呂元淳弟奉議郎元忠父吏部郎
中充天章閣待制景初可特贈通議大夫元淳母
仙源縣君陳氏可特贈潁川郡太君元忠母永康
縣君魏氏可封安福縣太君制

宗祀均福普及幽顯所以昭孝德之光于四海亦不遺
小國之義也具官程珣妻侯氏粵以令德嬪于茂族輔
佐君子稱為女師餘芳不泯既沒如在特疏郡封以為

湯沐從夫之貴當榮于室泉壤有知歆此光寵具官呂
元淳弟元忠父某直清勵志端直立朝脩途聘而未窮
高風沒而猶振肆其後裔並列朝闈慰其蓼莪之心中
以漏泉之澤進加寵秩增賁幽窆其亦有知膺我休命
元淳母陳氏粵以令德嬪于茂族輔佐君子稱為女師
餘芳下泯鍾慶仍厚爰因子貴追預夫榮特疏郡封以
為湯沐尚期幽壤歆此寵章元忠母魏氏韞德幽間作
嬪良與母道既茂子貴方顯屬此合宮之祀方賚溥天

之慶宜疏封邑仍畀名城既崇湯沐之榮亦慰烏鳥之報

朝散大夫司農少卿同宗且故伯父任尚書虞部
郎中繹可贈朝請大夫故伯母長安縣君杜氏可
贈昭德縣君制

禮之所起由義與恩尊尊親親率自是出惟宗旦懷世
父世母鞠育之愛思有以報有請于朝不徒爾也用已
致課陟明之賞推而移之可謂能不忘恩者矣雖法所

未有可以義起也無害于尊尊親親吾亦安得恡而弗
從加秩一等增邑湯沐用告其弟足為光寵

彭城集卷二十三

欽定四庫全書

彭城集卷二十四

宋 劉攽 撰

奏疏

貢舉議

臣准御史臺告報進詔書天下學校貢舉之法博訪臣等今得詳議者臣愚以謂人主之舉事與人臣之獻議不同人臣之議者盛言古事以為高侈言已忠以為博

迂遠而不切事情漫汗而不濟世務雖已自知其無益于治矣而猶為之何也其言之有理其持之有故其名之所存足以夸衆眩俗故敢為而不疑耳人主之舉事則不然度時之所宜因俗之所安不為虛名而棄實效不慕遠業而捐近功使令出而言必信事舉而俗必定故與其出令不當而亟改之不若謀事於始而慎慮也今陛下患選舉之法不明教育之方未善此必有以前古久遠之事感動上聽者不可不察也本朝承百王之

未創起律令雖未及三代其隨時因俗之宜應變增損
不常亦成一朝之制而選舉之法行之百有餘歲累朝
將相名卿及今之所謂賢材與共天下之論議者皆非
以他塗進者也而誣以未嘗得人臣竊以為過矣且臣
論之今時選舉之患不在創法之未善而在有司之弗
良不患試言之非要而患聽者之不察何以言之今國
家求賢良異材之人則使公卿薦舉求文學經術之士
則使郡縣推擇此雖三代取士何以過此帝典之言曰

數納以言孔子曰不知言無以知人也然則未知人莫如聽言故國家試士以文詞亦二帝數納之比也誠使有司兼仲山將明之才懷孟子知言之術精聽慎擇則賢不肖豈不較然由今觀之取士之法本未嘗失而有司之聽或不能盡今以有司之不能盡而變法法雖亟變而不擇人付之雖法如三代猶將終無益也議者或謂文詞之為藝薄陋不足以待天下之士臣愚以謂今進士之初仕者不過得為吏部選人國家待門廕恩澤

者亦為選人流外小吏亦為選人選人如此之卑也而天下之士以文詞應此選豈不固有餘裕哉朝廷設置何等爵祿而更艱難其選乎且進士成名者國家亦何嘗便以為才傑而任用之或以文章顯或以法律用或以善政事稱或以治財賦進皆待其來日成效而後有取則夫取士之始亦何用靳靳吝惜若不得已哉且朝廷欲更選舉之法將以想望高材豪傑之士也今天下之士至於禮部者歲不下二千人朝廷豈能以玉帛之

聘弓旌之招而遍得此乎必亦使之投牒自進耳士之
投牒自進必非豪傑之士伊尹管仲之儔雖更其科試
而取之徒小異其名目然其得士未有以異於前也更
恐好利銜鬻之人崇虛名以亂真則取士之失又甚於
往日矣議者又謂不如一用鄉舉里選者此又知其一
未知其二也夫二漢之用鄉舉里選所以得人者其時
郡縣之吏自廷掾諸曹卒史馭吏亭長游徼皆賢士為
之故其臨財不苟則知其廉值事能斷則知其智文武

材畧莫不畢效故其譽之有實舉之不難自流品分別
郡縣吏卒棄絕為賤不齒于搢紳賢士不復從此役士
之居鄉里者何由察知苟憑虛名以進人後有不稱將
復相與蔽護其短而謂之材終亦不得真賢實廉矣是
鄉舉里選又不可盡用也凡此數端皆臣所以深疑者
也不知臣之愚陋至此耶抑亦千慮將有一得也然愚
者之志專則難移故臣願朝廷且毋庸輕變選舉之法
不如因舊法而慎選有司之為愈也雖然尚有一說今

有人於此明辯足以判獄訟智畧足以治財賦而文詞
不足以自發經藝不至於浹洽則將捐棄終身無仕進
之望其才豈不可惜哉臣願陛下為設從政科使公卿
及監司舉所知以充選必有舉者三人乃召而用之且
毋以為真試之三年才任其事然後命之以官即不可
使復還為民而坐其舉者如此則天下之材士殆無遺
逸矣臣聞教育之法所以治性也性修則智明智明則
應物不惑不惑則盛德之士也自兩漢以來學者未嘗

不以利祿為心夫可誘以利祿而勉強為善則德性離
矣是故造士不及三代者由此也今陛下建學校為置
明師而誨導之毋問其所學毋限其所能則資材莫不
養育矣若惡文章之敝而以經藝勸之學者之志不出
於為利祿也則文章之士變而為經藝雖曰不同其離
於德性也均矣天之生材有昏有明智明材大者非小
智小識之所能掩也及其淺晦下材雖曰捷之亦終不
能以致高大士修之於家足以成材亦何待學官程課

督趣之哉

覆宗室遂寧郡王承範謚僖溫議

王以同姓支屬鬢髮仕宦耆艾沒齒更歷顯榮五十餘
歲若其闕廷之禮束帶垂纓而齒內朝者久矣郊廟之
事執膳賜爵而均福慶者多矣無錯立族談之謫有夙
興夜寐之勤纖介之失未嘗上聞其小心恭慎之謂乎
夫膏粱之性難正世祿之家鮮禮矯情抑心不可常也
而王修身訓族歲久彌固其德性溫和之謂乎麟趾之

詩公族信厚以為關雎之化東京諸王不失法度以為
永平之美王之樂善朝廷之教也易名僖溫謂王宜之

攷功覆吳尚書謚文肅議

尚書力學強記有志於從政非若世儒徒以經術通明
文章奇偉為顯名垂譽而已也是故始立朝則以直言
讜議開悟上聽然後舉賢良方正守稱其選凡為諫官
近臣而上謂其言盡遭事不感知無不為沮止佞邪發
舉善政以至更歷二府始終一節太史公所謂扶義倅

儻不使已失時立功名於天下尚書有焉其謂之忠信接物執心決斷非虛美也

太常寺論封爵狀

臣等伏見周禮封爵諸侯皆有命書典策又有約劑書於宗彝及漢封功臣亦有丹書鐵契藏之宗廟誠以封爵之事傳世無窮不可不慎重其禮且以防後世之爭辨也本朝慶厯中始為諸王置後傳襲其時上恩雖厚而有司典策不脩約束不明昨因邢國公世永亡歿冀

王越王兩宮爭訟尋求故事以斷是非自中書宗正寺
禮院史院皆無文書可以討論然亦非有司有所墜失
也臣等以為諸宮傳襲封國者甚多今不為造作約束
恐後日常有紛競不已宗室爭辨薄義傷化甚非美事
本朝制度雖不盡用三代自當因宜立憲著為律令使
可遵守藏之大宗副在中書太史禮官貳之合於周禮
之宗彛約劑漢氏之丹書鐵契傳示無窮於禮甚便欲
望朝廷特賜詳酌下禮官等參議施行

舍人院奏乞再建紫微閣狀

臣等伏見舊中書舍人院有紫微閣真宗皇帝御篆題榜副本刻石自重修三省紫微閣墮折御篆無所張掛伏以本朝建築省閣上法天垣前聖有作自難減損至於宸章天翰宜永垂後萬億千歲瞻仰寅奉在周之時天球河圖兗戈和弓異代之物尚皆傳保戈圖庸器每祭陳之何況巍巍聖作其可度置不顯有司惜土木之小費靳人力之微勞甚無謂也或謂神宗皇帝已不建

閣臣等以謂先帝釐改制度次序行學實有未暇至於
崇奉祖宗必有深旨安知其構築不在方將也伏乞聖
慈特賜詳酌復於中書後省建置紫微閣標掛御篆於
以完本朝之舊制副前聖之垂憲事體甚大實班列之
所深願臣等不勝惓惓之至

辭免中書舍人狀

臣准尚書省劄子告示已降詔命授臣中書舍人令臣
發來赴闕承命震悚不知所措臣年齒衰暮舊學荒廢

方將發揮孚號潤色典訓不當蕪漫失次以速官謗伏望聖慈鑒其悃誠罷寢恩命以安賤分

兩制議秦王襲封狀

臣等謹詳熙寧詔書為秦王置後其時判太常寺陳薦等議請以秦王庶孫克繼為後知禮院韓忠彥等請以承亮為後先帝兼鑒二議詔依忠彥等所定大宗正司言所立嫡庶不當乞賜詳定又詔兩制官改議王珪等議當以克繼為秦王後奉聖旨依已得指揮承亮遂封

秦王臣等聞易曰大君有命開國承家故春秋之義唯天子得以專封今承亮為秦王後詔旨丁寧如此是大君命之開國天子所得專封承亮受國傳其子克愉已經兩世無為輒屑論議於其間且上攷前世史傳及本朝故事未有傳國兩世復議移奪者今克愉亡歿自當依禮律置其後嗣其他宗室妄有訟訴不在採聽之限

論汝州合建節狀

臣伏觀今月四日赦書節文其京東京西曹許州並升

為輔郡者伏以萬乘之后兆衆所集內則提封千里外
則別置四輔蓋欲以拱衛王圻威重帝室陛下稽古圖
政憲天垂法以曹許之地當輦轂之側雖壯鉞廉車足
治浩穰而神州赤縣近屬倚毗殊其命稱實脩闕典茲
前代之弗及亦萬世之不遷然臣聞自昔二郡皆為甸
服廟社所寓宮闕相望憲章不殊名實共貫今二郡制
度既已恢大而西郊事體獨似久缺敢陳狂瞽少裨萬
一竊見汝州遠自唐室久為輔郡爰及聖代馮翊別都

距土中無數舍之遙聚生齒有六縣之衆襟帶河洛藩
屏楚鄧而乃列在支郡稱可防禦於衆賢之封最為不
稱在陪京之域莫有比倫且金隨僻陋之區止利巴焚
之邑非要害之重無都會之稱尚且立節建牙兼官累
印何況周南近壤洛宅上流可以無千乘之車備三軍
之士區區小邦自守而已翼翼商邑不亦與哉臣愚以
謂汝州既與曹許同是輔郡自宜升為節鎮如此則東
西兩京左右二輔形勢壯大典法該脩足以昭寰內之

巍巍增天威之赫赫且鄭州雖名石翊本以小侯近自景祐之初始賜奉寧之號故事未遠有司具存伏乞聖慈下兩府詳臣所奏議定軍額特降指揮

論封太祖後狀

臣伏見手詔推求太祖皇帝諸孫屬近行尊者立以為王以光大成功偉業此誠陛下追孝祖廟聖恩無已舉百王之所未嘗用而行之則傳所謂禮雖先王未之有可以義起也然竊觀詔旨所處猶有未喻恭以太祖皇

帝傳國太宗雖以兄弟為後然大統所在繼體之君皆
太祖子孫也盛德之祀澤厚流光舉在是矣何待復求
諸孫而王之如是則祖廟有功不毀之稱列聖繼統不
承之美反不及置一國乎古者惟列國之君無嗣則有
求其子孫而紹封之者祖宗之重不可與此同議又諸
侯不得祖天子今封王當自為其國之祖終不敢上承
太祖明矣臣以為陛下欲褒揚藝祖豈無其說按春秋
傳曰管蔡郕霍魯衛毛聃郕雍曹滕畢原酈郕文之昭

也文王造邦為周太祖子孫封國最多後世不敢與並
漢明帝亦曰我子豈可與先帝子等故世祖諸子皆封
大國而明帝子才半之也然則帝者之世崇厚始祖之
子當必異於繼體矣太祖皇帝之子惟德昭德芳二人
陞下何不崇此二國之後世世不降其爵與周漢等盛
宗廟祭祀使之在位則藝祖巍巍之慶陛下蒸蒸之孝
無不休顯著明矣臣以愚戇待罪禮官知陛下推崇祖
宗顧聖慮超越非羣臣所及猶願攷合典禮使其大義

可以講說為萬世法故敢冒進瞽言伏望少加采擇臣
無任戰栗之至

太學申監狀

右檢會先降勅命主判官與衆學官於學生中推文學
年德可師一學者二人以為學正學官選公正廉直者
二人為學錄爰自建學以來常奉詔從事皆用生員學
官以蒙訪逮只從去年補孟醇為學錄今次補劉濊為
學正直講不得預聞判監特然給帖孟醇曾在太學乍

可甄收劉濛來自他方初不諳識化筆默定有若疾雷
博士備員不翅虛器某等自知愚戇無似拙直可惡倚
席不講尸祿素飡識慮無知人之明何足取信官秩有
隔品之賤不當下問豈可厚顏更伸餘議其如在學生
員數逾二百郡無俊秀未可厚誣今來忽使不知何人
自外突然遽相董正耳聆未聞其稱譽目擊無異于輩
流誰肯自謂不如例使甘心為下又上庠教育之盛若
此祭酒樂善之廣如彼纔選一士便須外求流聞四方

抑亦甚陋伏念內舍限數已依勅命施行唯此學正差人却與詔旨違戾本末不稱義理未安欲乞少還尸祝之分薄采芻蕘之議上遵甲令下慰諸生若以謂已行之命出於特達橫議雖多不可中止卽乞明降約束斷自將來粗用詔條未令廢格少存寮屬略賜誰何者以前件如前謹錄狀上

侍講不合坐狀

臣等議以謂侍從之臣見於天子應對顧問講論古事

不可安坐自若避席立語乃是常禮今公著等自以傳
先王之道求異其禮是大不然何以明之凡九經章句
之說出於近世諸儒訓詁委瑣未必皆合於聖侍讀之
職傳道章句之學耳是故使與舊史諸子雜陳於前而
明主一採擇之然朝廷班制猶以侍講居侍讀之下祖
宗建官之本意其可知也今忘其章句之細而自謂道
德備已不察侍從之實而求以師賓見異不亦繆乎議
者又謂天禧之時侍者讀者皆坐天聖之後皆立至今

侍者坐而講者立以謂有司之失臣等以謂侍從之臣
預於閒燕坐立不同人主可以專之不可計校前後歸
過有司至於人臣求自殊異取必于上則為不可昔仲
尼正假馬之名而拜下違衆曰事君盡禮人以為諂也
今人主之待侍臣自始見以及畢講皆賜之坐而從容
馬上意優厚亦已至矣不可復以暫立為難如公著等
議臣等以為不可許

薦王覲狀

准敕應臺諫官館職各舉才行堪任升擢官一員令中書審察如所舉不謬取旨隨材試用者右謹具如前臣伏見新授權潤州觀察推官王覲學問通達不惑異說其在鄉里以孝弟見稱其於仕進所謂行已有恥者臣今保舉克應前件詔書如經試用有不如舉狀臣甘連坐謹具狀奏聞

辭直龍圖閣狀

臣准閣門告報已降告命除臣依前朝議大夫直龍圖

閣知蔡州事者聞命震驚固知所措伏念臣本以羸病
乞從外補聖恩開許即為厚幸今乃貼以閣職豈臣愚
陋所可堪任且臣非有德度標矩素為士林之望又無
治民之最簡在王府擣昧戇拙無異於衆人非次蒙被
恩寵是謂僥倖之人足玷聖化伏望朝廷察臣惴惴採
其寸誠收還謬恩以安愚分臣以賤官得分民社自可
竭力上報鴻造臣不任懇切之至所有告命未敢祇受

申中書坤成節合罷齋筵狀

伏見太常禮院定到儀注緣為荆王薨坤成節依內降指揮更不上壽其罷散道場及齋筵並依舊看詳坤成節上壽禮院依據前例奉行中旨即為允當其齋筵等事別不聲述稽據但云並依舊實有可疑何者坤成讌設本緣上壽今既罷奉觴又輟大讌則齋筵何可依舊罷散道場對佛作樂本緣佛事可以如常至於齋筵廣陳聲伎簪珥花卉飲食醉飽倡優諧笑方兩宮惻怛之際臣子亦何心安此歡娛也若以為齋筵主為羣臣與

荆王不相干涉是則然矣其如兩宮惻怛羣臣瞻奉安
得如秦人之視越人都忘不相眷之義乎伏見嘉祐年
中宰相富弼丁憂仁宗皇帝正當春宴特為輟止弼母
於國不繫休戚仁宗但以相臣新在慘怛為輟盛會上
恩之於大臣如此其厚今兩宮惻怛而令羣臣怡然安
坐醉飽歌舞歡娛雖聖慈聽許臣子之心其亦何安臣
愚以謂北客外臣可使就驛賜宴自餘羣臣何須集會
為家兄謝除汝州狀

臣准敕改差臣知汝州事續准中書劄子伏蒙聖恩以臣久病艱於拜起免臣朝參及放辭者臣蘊材無狀移病歷時曠形廷之奉朝廢金華之事業按舉故事皆合免歸蒙賴膚私再從賜告間者辱珥貂之臨問加苞實而是將爰暨邇臣每聆諄誨以茲叢陋之質微簡上心在於魂夢之交忍違帝所而臣生計無力家居屢空娶族云多仰哺者衆樵蕪不給饘粥是虞輒輸肝膽之誠竊冀乾坤之造得循近例出補小邦敢謂聖慈俯從私

欲專城攸寄已叨分竹之榮及瓜告期尚有繫匏之歎
游蒙易地仍委陪京矜臣疲瘵之餘恕臣筋力之弱許
臣拜命里宅免臣謁辭上臺雖復慈親鞠養之恩不能
如此周至穹昊陶鈞之力不能若是曲成在臣何功遺
此多幸支離受粟愧厚賜於千鍾疲馬戀軒荷深仁於
短豆危心易感隕涕無從

亳州奏太清宮再生槐狀

伏以猶龍故里隱土奧區仙真之所顧懷協氣于焉回

復率多靈物以表珍符庭檜再生既發祥於章聖古槐
條肆復效祉於昌辰朽枿不記其歲年秀稊頓新于雨
露神色還觀華萼聯輝昔唐叔嘉禾異畝同穎而為美
元狩竒木衆枝內附而告休于以北方一何遼邈蓋天
瑞者依類託寓以應至誠雖塗人之寡見淺聞必喻鴻
造臣等目覩盛事內極歡心無任忭悅激切之至畫圖
隨狀進呈伏乞宣付史策

為馮翰林入院謝對衣鞍轡馬狀

服章稱德故金紫盛其光榮賚子有功則車馬示之蕃
庶臣叨職禁近已愧菲材拜賜宸廷何勝厚幸矧其王
閑駿足內帑褚衣環金在躬鞶纓照乘願惟涼德徒積
覲顏此蓋伏遇皇帝陛下豐用財於養賢加實幣於將
厚雖在蒞之慎而不吝于五章非康侯之才乃蒙休于
三接仰愧分衣之寵俯迷執御之方何以上報生成無
慙彼已

彭城集卷二十四